

U ZLOČINIMA U SREBRENICI UČESTVOVALA 19.473 PRIPADNIKA VOJSKE I POLICIJE RS



SARAJEVO, 8. oktobra (FENA) - Radna grupa za Srebrenicu, formirana da utvrdi broj i identitet osoba koje su učestvovala u događajima u i oko Srebrenice od 10. do 19. jula 1995. godine, ustanovila je učešće 19.473 pripadnika Vojske Republike Srpske i Ministarstva odbrane te Ministarstva unutrašnjih poslova u srebreničkim događajima, od ukupno 25.083 pripadnika ovih formacija. U broj učesnika stravičnih događaja uračunate su 243 osobe iz civilne zaštite te jedan broj vozača.

Utvrđeno je da su počinitelji zločina i pripadnici specijalnih policijskih snaga Srbije „Škorpioni“, ali i brojnih drugih specijalnih policijskih jedinica iz Srbije, kao što su „Crvene beretke“ kojima je komandovao Vasilije Mijović te pripadnici 20 organizacijskih jedinica iz Drinskog korpusa ili drugih vojnih formacija.

Te podatke iz Konačnog izvještaja Radne grupe za Srebrenicu prezentirao je danas u Sarajevu član Radne grupe iz reda Bošnjaka i predsjedavajući njene istražne podgrupe prof. dr. Smail Čekić u javnom razgovoru s članicama Udruženja Pokret „Majke enklava Srebrenica i Žepa“.

Čekić je pritom napomenuo da „Škorpioni“ nisu paraformacija, već regularna specijalna jedinica, upućena od tadašnjeg režima Srbije.

Najnoviji podaci iz dokumentacije Drinskog korpusa, do kojih je uspio doći Haški tribunal nisu dosad korišćeni u sudskim procesima. Dosad je bio nepoznat podatak da je jedna vojna jedinica zajedno s policijom 14. jula 1995. zarobila i likvidirala od 1.000 do 1.500 muslimanskih civila i vojnika na području Pobuda i Konjević-polja, kazao je danas Smail Čekić.

Izvještaj Radne grupe sadrži i podatke o osobama upletenim u događaje u Srebrenici, a angažiranim u vlastima BiH, entiteta ili općina.

Spisak učesnika u srebreničkom zločinu još nije konačan. Izvještaj sadrži prilog o nekoliko hiljada počinitelja čija se imena pojavljuju po dva puta, ali s različitim podacima o godinama rođenja ili drugim detaljima, pa još nije moguće precizirati da li se radi o jednoj ili dvije osobe sa sličnim podacima.

Nema mjesta sumnjama da su među učesnicima u srebreničkim događajima bili i strani državljani, uključujući dobrovoljce, sadašnji pripadnici Vojske Srbije i Crne Gore, a tada Vojske Jugoslavije, kazao je Smail Čekić.

On je danas govorio i o teškoćama s kojima se Radna grupa susretala tokom istraživanja u potrazi za podacima od nadležnih ministarstava RS, posebno od Ministarstva odbrane.

Pripadnica Udruženja Pokret „Majke enklava Srebrenica i Žepa“ Kada Hotić izjavila je nakon Čekićeovog izlaganja da je sada na potezu pravosuđe Bosne i Hercegovine. Ona je izrazila bojazan da će srebreničke žrtve „propasti“ u ovom zločinu, ukoliko sudstvo ne izvrši posao kako treba.

Ilijas Pilav, predsjednik Kluba intelektualaca Srebrenice, zaključio je da su preživjele srebreničke žrtve nakon ovog izvještaja tek na pragu do istine.

"Izuzetno veliki broj počinitelja zločina ne ukazuje na pojedinačnu, već kolektivnu odgovornost. Taj kolektiv je Republika Srpska, izgrađen na zločinu i krvavim temeljima. On mora biti demontiran" izjavio je Ilijas Pilav. 🐦